

## **Leidse charters van de secretarie betreffende Zoeterwoude en Stompwijk.**

*bewerkt door*  
Anthonius van der Tuijn

### **Inventaris 0501-147 Regest 258 d.d. 15-05-1404.**

Copia Copie.

Aelbrecht bi goids genaden palensgrave upten Rijn, hertoge in Beijeren, grave van Henegouwen, van Hollant, van Seelant ende heere van Vrieslant doen cont allen luijden dat wij om menigh trouwen dienst die ons heren Florijs van Alcmade ridder dijcwijl gedaen heeft ende noich off god wil doen sal, den selven Floris gegeven hebben ende gheven mit desen brieve dat soe wie op heren Florijs voorscr. hoffstede woont, diemen op dese tijt noemt here Wouter werff, gelegen inden ambocht van Zueterwoude ende poiter is te Leijden off poirter aldaer wt dat die voorsz. hoffstede woende mach bliven in poirters gemoede. Dat is te verstaen dat hi ende alle die gene die besitter sijn ende werden sullen der voorscr. hoffstede, daer op wonen mach ende dair poirterschap verwaren gelijkkerwijs off hij binnen onser stede van Leijden wonachtich waren. Dit sal geduren viertien dagen lang na onsen wedersegge. In oirconde desen brieve besegelt met onsen segele. Gegeven inden Hage upten vijftien dach in meije int jaer ons heeren in 1400 ende vier.

Onder stont: Naer collage gedaen jegens sijn principale ende is daer mede bevonden (huijden den 12<sup>e</sup> augusti 1599) te accorderen. Bij mij. Ende was onderteijckent S. Lenaertsz. van der Wuert. Opten rugge stondt folio 185 effect van citatie artikel 6. Alt welcken te verstaen es van eene goede vast ende onwederleglicke citatie. Want tes een seecker regel dat een citatie nules ende van onwaarden geender handen cracht en van opereren, off eenich effect produceren in vougen dat gheen default mach gegeven warden jegens den non comparaten qualike ende tonrecht geciteert zijnde. Ende alles wat volcht een quadt glossain ... accusatoirbus ad vacen. Eidem etc.

Copia Copiae van het privilegie van hertogh Aelbert van Beijeren als graeve van Hollandt etc. gegeven aen Floris van Alcmade ridder houdende dat de possesseur van heer Wouters werve (naderhandt genaemt 't huijs te Kronensteijn) poorter te Leijden zijnde en aldaer woonenden, sijn poorterschap bewaert tot 14 daegen na sgraven wederzeggen.

Gegeven 5 meij 1404.

-----

### **Inventaris 0501-775 Regest 1751 d.d. 04-12-1548.**

Ick Adriaen Vranckensz. scout inden ambocht van Zoeterwoude doe condt allen luijden dat voer mij ende den buijren hier nae gescreven gecomen ende gecompareert sijn Jacob Claesz. houtcooper ende Dirck Jan Reijers zoonz. ende Mees Doensz. als curatoers ende voichden bij den gerechte der stede van Leijden geordonneert ende gestelt vande onmondige ende oick mondige kinderen van Claes Cornelisz. Cock saliger gedachten, beroerende de goeden achtergelaten bij Claes Cornelisz. voorsz. haer vader, Baertgen Heijnricx dochter sijn huijsvrouwe hoer moeder ende Willemtgen Oudtziers dochter, Jan Dircxz. houtcopers weduwe, haer oude moeder nae inhoudt zekere brieve van auctorisatie dair van zijnde bezegelt mitter voorsz. stede dagelicxe zegele in date upten anderen dach in januario int jaer ons heeren duijsent vijfhondert achtendeveertich nae scrijven der kercke van Vuijtrecht ende der zelve stede die mij schout ende buijeren voorseijt dair van verthoent is geweest. Ende gelieden dat zij vercoft hebben die vier burgermeesteren der voorsz. stede als jonge Dirc Jan Reijerszsz., Claes Adriaensz., Adriaen Jansz. ende Jacop Jansz. van der Graft totter zelve stede behoeff een huijsinge ende erve mit zekere cameran ende hoeren erven daer toe behoerende, gelegen buijten die Hogewoerts poorte anden Rijndijck inden voorsz. ambochte van Zoeterwoude, aftergelaten bij den voorn. Jan Dircxz. Ende heeft belegen an die een zijde Baertgen Mees dochter, Jan Paeds Bouwensz. weduwe ende an die ander zijde Gerijt Boeckelsz. Buijtewech mit een halve sloet, dair of die wederhelfte behoert totte voorsz. huijsinge ende cameran mit hoeren erven, streckende voir vanden dijck after inden Rijn. Ende die voorsz. curators ende voichden inde qualite als boven loveden die voorn. stede van Leijden deze voorsz. huijsinge ende erve mitte voorn. cameran ende hoeren erven daer toe behoerende, te waeren jaer ende dach als recht is ende alle commer of te doen die daer nu ter tijt up staet zonder derdalve stuver tsiaers ende vijftalve stuver siaers eewijge pacht ofte mitten houde. Ende die voorsz. curators ende voichden belieden hem totten voorsz. kinderen behoef van dese coepe wel voldaan ende betaelt, den lesten penning mitten eersten. Alle arch ende liste buijten gesloeten. Hier hebben bij, an ende over geweest als tuijgen ende buijerluijden inden ambochte voorseijt Willem Roelofsz. ende Cornelis Luijten zoen. In kennisse der waerheijt. Soe

hebbe ick Adriaen Vranckensz. schout voorsz. in tegenwoirdicheijt vande voorgaende tuijgen ende buijerluijden dezen brief bezegelt mit mijn zegele hier angehangen. Int jaer ons heeren duijsent vijfhondert acht ende veertich upten vierden dach in decembri.

-----  
**Inventaris 0501-776**

**Regest 1779 d.d. 26-10-1551.**

Wij Gerijt Roelofsz. ende Willem Aelbrechtsz. schepenen in Leijden oirkonden dat voir ons quam Pieter Claes Adriaenszsz. brouwer verclaerende hoe dat hij comparant onlanx leden gecoft heeft vander heijlige geestmeesteren binnen Leijden een zeker stuck lants mit een stael ende een halve sloet, gelegen buijten die Hogewoerts poerte over die Minre broeders inden ambocht van Zoeterwoude, mit voirwairde dat die voorsz. Pieter Claesz. zijnen erven ende nacomelingen tvoorn. lant nijet en zullen betijmmen mit eenighe huijsen ofte schuijeren. Ende omme de zelve voirwairde volcomen ende onderhouden te worden soe ist dat hij comparant beloeft heeft ende beloeft mits desen voir hem zijnen erven ende nacomelingen als dat hij noch zijnen erven ende nacomelingen tzelfde lant tot ghenen tijden en sullen betijmmen mit eenighe huijsen ofte schuijeren gelijk voorsz. staet. In oirkonden dezen brief bezegelt mit onsen zegele. Int jaer ons heeren duijsent vijfhondert eenenvijftich upten zesendetwintichsten dach in octobri.

-----  
**Inventaris 0501-1194**

**Regest 155 d.d. 28-05-1384.**

Wi Hughe van der Hant ende Jan Stantvast Ludolfs zoen scepenen in Leijden oirkonden dat voir ons quam Hughe vanden Bossche, nu ter tijt scout inden ambocht van Zoeterwoude ende beliede dat hi vercoft heeft Vrancke Diedewien zoen ende Pieter Butewech Gherijts zoon nu ter tijt heijlich gheestmeesterts zien in sinte Pieters kerke te Leijden tot des Heijlich Gheest behoef, drie morghen lants luttel min of meer ter goeder maet, die gheleghen zien inden ambacht van Zoeterwoude. Ende beleggen heeft an die oestzide Danel Wouters soen ende an die westzide Matheus Jans soen aelmis lant (van de) Vliet streckende after wairts an Danel Jacobs zoen ende Dirc Warnars zoen lant. Ende dit voerseijde lant loeft Hughe vanden Bossche voorsz. te waren Vrancke Diedewien zoen ende Pieter Butewech voorsz. toten ewighen daghen ghelicker wijs als men vrijerne is sculdich te waren him of zijn nacomelinghers. In oirkonde desen brieve bezegelt mid onzen zeghelen. Int jair ons heren duijsend drie hondert vier ende tachtich op den Pinxster avond.

-----  
**Inventaris 0501-1195**

**Regest 551 d.d. 09-11-1445.**

Ic Pieter van Bossch Dircxz. scout inden ambocht van Zoeterwoude doe condt allen luijden dat voir mij quam Pieter Dirc Nellenszsz. ende geliede dat hij vercoft heeft die heijlige geestmeesters van Leijden alse Clais Post, Jan Clais Sijmon Jan Stiensz. ende Screvel die Bruijn tot des Heijlige Geests behoiff een tuijn gelegen inden ambocht van Zoeterwoude buijten der Hogewoirts poort. Ende heeft belegen an die een zijde die Mijre broeders inden Wairt ende an die ander sijde Pieter voorsz. selve, streckende voir vanden dijc after anden Rijn. Welcken tuijn Pieter Dirc Nellenszsz. voorsz. lovede den heijligen geestmeesteren voorsz. of diet namails wesen sullen tot die Heijlige Geests behoif desen voorsz. tuijn te waren, jair ende dach alse recht is ende allen commer of te doen die dair nu ter tijt op staet sonder ses scellingen ende ses pennijngen goets gelts tsiairs mitten houde die den Heijlige Geest dair op heeft. Ende hier of beliede hem Pieter voorsz. wel voldaan ende betailt den lesten pennijnc mitten eersten. Voirt sijnt voirwairden dat Pieter voorsz. desen voorsz. tuijn losenen mach mijt vijf gouden rijders tusschen dit ende meije naistcomende. In kennisse der wairheit soe hebbe ic Pieter van Bossch voorsz. mijnen zegele hier an gehangen. Int jair ons heren duijsent vierhondert vive ende veertich upten negenden dach in novembri.

-----  
**Inventaris 0501-1664**

**Regest 839 d.d. 15-06-1472.**

Ic Pieter Sijmensz. scout inden ambocht van Haserswoude doe cont ende kenlic alle luden dat voir mij quam Dirc Brueijnesz. ende geliede dat hi vercoft heeft Jan Aerntsz. een husinc ende berginc ende poterie ende al dat aertvast ende nagelvast is. Ende dese husinc is staende inde ambocht van Haserswoude ende inden ambocht van Zoeterwoude, gehieten is inde (Baric). Ende dese voorsz. husinc belijt Dirc Brueijnesz. wel of voldaan ende betaelt den lesten penninc mitten eersten. Ende dese selve voirsch. husinc loefde Dirc Bruijnesz. vri ende onbecommert te waren tot desen dage toe ende Vranc Bruijnesz. als wairborch. Ende hier hebben bi ende an ende over geweest als tuijch ende buerluden Jan Steen ende Bouwen van Tol. In kennissen daer wairheit soe heb ic Pieter Sijmensz.

als scout inden amboch desen brief over hem bezegelt. Int jair ons heren 1400 ende 72 gescreven opten 15<sup>e</sup> dach junius.

**Regest 1240 d.d. 07-11-1511.**

Ick Claes Pietersz. scout inden ambocht van Hazerswoude doen kondt allen luijden dat voir mij quam Heijnric Aerntsz. van Leuwen ende geliede dat hij vercoft heeft Gerrijt Bouwensz. een huijsinge, bargaen, schueren, potinge, aertvast ende nagelvast mit die bruijckweer van lande dair toe behoerende, ghelegen inden ambocht van Hazerswoude ende inden ambocht van Zoeterwoude, ghehieten die Barle. In allen manieren ende na inhoud dese brieven dair desen brief doirsteken is. Welke voirsz. huijsinge, scueren, bargaen, potinge, aertvast ende nagelvast Heijnric Aerntsz. voirsz. gelooft voir him ende zijnen erven te vrijen ende waren jaer ende dach als recht is ende allen commer of te doen tot nu ter tijt als men een vrij huijs, bargaen, scueren, potinge, aertvast ende nagelvast sculdich is te waren inden ambocht dair gelegen is. Van welke coop Heijnric Aerntsz. voirsz. lijdt ende bekent voir him ende zinen erven wel voldaan ende betaelt te wesen van Gerrijt Bouwensz., den lesten pennijnck mitten eersten. Alle argelist wtghesondert. In kennisse der wairheijt so hebbe ick Claes Pietersz. scout inden ambocht voirsz. desen brief bezegelt ende doirsteken mit mijn zelfs zegel ende hier onder an gehangen. Dair bij waren als tugen Adriaen Claesz. ende Willem Heijnricxz. Int jaer ons heren duijssent vijffhondert ende elf upten zevendach in novembrij.

**Inventaris 0501-1713**

**Regest 231 d.d. 10-01-1399.**

Wi Dirc van der Gheest ende Pieter Bouwens Gherijtsz. scepenen in Leijden oirkonden dat voer ons quamen Heijman Pieters soen ende Pieter sijn soen ende ghelieden dat si mit malkander opgedraghen sien eenre cavelinge die si ghemaect hebben om sulken lande als si mit malkander ghemeen hadden roerende vander erfnisse die Pieter voirsz. an bestorven is van zjnre moeder doot die god ghenadich is. Duer welke cavelinge waren goede (mannen) hare beider vrienden ende maghen als Jan van den Woude, Vranc Diewaren zoen, Jan Sijman Daniel Harmans zoen, Pieter Post ende Pieter Jans soen. In den eersten is Heijman Pieters soen toe ghecavelt sulc lant als hier na bescr. staet, dat is te weten derdalf marghen lants ende een hont lants ghelegghen inden ambocht van Voerhout ghemeen mit Heijnric van der Does. Item een campe lants ghelegghen inden ambocht van Warmond op Hem weer ende bruct Dirc Paew. Item een campe lants ghelegghen op Norre weer sl... samen gherekent voer vijf marghen ende twee hont. Item Zijmans camp ende hout vijf marghen. Item inden ambacht van Alcmaed bi Willem Aliden zoens huis, Wolmers horn, Gherijt Nebkers camp ende die riet zedden, gherekent voer tien marghen drie hont. Item Verleiser camp (gat in het papier) noort ende die ses marghen te zamen gherekent voer seventiendalf marghen. Item den Platten camp ende die vijf co..... gerekent voer ses marghen. Hier jeghens sie Pieter voirnoemt an ghecavelt sulken lande als hier na bescr. staen. Eerst inden ambocht van Zoeterwoude bi Rodenburger laen neghen marghen lants. Item inden ambocht van Leijderdorp vierdalf marghen ende elf hont lant ghehieten ..... camp die Heijman cofte jeghen Sijmon Meijnsen soen ende Dirc Sellem. Item inden ambocht van Warmond vijf marghen lants ghehieten den Rugen Horn. Item inden ambocht van Alcmaed bi Vranc Claes sniders soens huus een campe lants hout ses marghen ende een hont. Item vijf marghen luttel min of meer in Pieter Willems zoens sate. Item vijftiendalf marghen lants ende hieten Willem Claes sniders soens zate die Willem nu ter tijt up woont. Ende Pieter Heijmans soens cavel (beter) is vande lande voirsz. dan Heijman sijns vaders cavel, so sient voerwaarden dat Pieter Heijmansz. sinen vader toe gheven sel wt sijns selfs goet vive ende tseventich pont pajments voersz. So houten Heijman ende Pieter voirnoemt alle goede ghemeen mit malkander die zi binnen Leijden hebben, tsij ghelt, husinge, (cilhaven?) hoe dat ghenaemt mach wesen. Desen brieve sien twee alliens, des heeft Heijman den enen ende Pieter den anderen. In oirkonde desen brieve bezeghelt mit onser zeghelen. Int jaer ons heren duijssent drie hondert neghen ende tneghentich tsonnendage na dertienden dach.

**Inventaris 0501-1735**

**Regest 122 d.d. 06-03-1373.**

Wij Gherred van Oesgheest ende Ghered van der Grafte scepene in Leijden oirkonden dat quam voir ons Dirc Poes Hamer ende gheliede dat hi vercoft heeft Philips Andries soen die helfte van vijf morghen lants, luttel min of meer ter goeder mate, dat ghehieten is tSijl weer ende die Grote Weijde ende ghelegghen is binnen den ambachte van Zoeterwoude. Welcke vijf morghen voirsz. belegghen heeft Dirc van Bakenesse mit ghemengheder voir an die westzide ende an die oestzide Willem Willems soen ende Machtelt Costijns dochter, streckende van vten Rijn op an Vrone made vaert. So quamen Dirc Poes Hamer, Vranc Vrancken soen, Sijmon Ghereds soen ende Pieter Dircs soen Poes zwagher voirsz. ende loveden mit ghesamender jant ende elc voir al Philips Andries soen voirnoemt dit voirghenoemde lant te waren, jair ende dach alsoe recht is ende men een vri volboden erve sculdich is te waren. Ende Dirc Poes Hamer voirseijt lovede Vranc Vrancken soen, Sijmon Ghereds soen ende

Pieter Dircs soen voirsch. hier of scadeloes te houden. Voert soe gheliede hem Dirc Poes Hamer voirnoemt hier of voldaan ende betaelt den lesten penninc mitten eersten. In oirkonde desen brieve beseghelt mit onsen seghelen. Int jair ons heren duijsent drie hondert ende tseventich op den groten Vastelavont.

-----  
**Inventaris 0501-1736**

**Regest 140 d.d. 06-03-1381.**

Wij Dirc Poes Jans soen van Leijden ende Dirc Hoghstraet scepenen in Leijden oirconden dat voir ons quam Willem Steven Poes soen ende gheliede dat hi vercoft heeft Jan Hamer sinen broeder, sulc lant als hi legghende heeft binnen den ambocht van Zoeterwoude mid Jan Hamer sinen broeder voirsch., Claes van Bakenessen ende Philips Andries soens erfnamen, in ghemengheder voir. Ende hem an quam van zijnre moeder doot. Ende Willem Steven voirseijt lovede Jan Hamer sinen broeder voirsch. dit voir ghenomde lant te waren jair ende dach alsoe recht is ende men een vrie volboden lant sculdich is te waren. Ende beliede hem dair of voldaan ende betaelt den lesten penninc mitten eersten. In oirkonde desen brieve beseghelt mid onsen seghelen. Int jair ons heren duijsend drie hondert een ende tachtich tsoendaghes na grote Vastelavond.

-----  
**Inventaris 0501-1737**

**Regest 146 d.d. 26-07-1382.**

Wij broeder Gherijt Splinter lantcommenduijre ende die ghemene broederen vanden Duijtschen huijse tUtrecht doen cont allen luden dat wij vercoft hebben om nut ende oirbaer des ghemeens convens Pieter Hughen soon vijf morghen lants, luttel meer of min ghelegghen inden ambocht van Zoeterwoude. Ende belegghen heeft ander oestzide Dirc van Zwieten, andie noortzide Sijmon Bort, andie zuijtside here Aernt Zwaelwaert ende ande westzide Jan Doerscrijn. Welke vijf merghen voirsch. wi loven te waren Pieter Hughen sone ende sinen nacominghe als men een vri eijghen erve sculdich is te waren. Voort so ghelien wij ons hier of voldaan ende betaelt den laetsten penninc mitten eersten. In kennesse der waerheijt so hebben wij desen brief beseghelt mit onsen ghemenen huijs seghel. Int jair ons heren dusent drie hondert twee ende tachtich tsaterdaghes nae sinte Jacobs dach.

-----  
**Inventaris 0501-1738**

**Regest 237 d.d. 24-12-1399.**

Wij Jan Jan Vecken soene soen ende Jan Huce zoen van der Hant scepenen in Leijden oirkonden dat voir ons quamen Dirc Ramp Gherijts soen ende Agniese sijn wijf ende ghelieden dat zij vercoft hebben Claes Willems soen die helfte van vijff marghen lants, luttel min of meer, ghelegghen inden ambocht van Zoeterwoude in Zwieterbroec. Ende heeft belegghen an die west zide cappelrien lant van Haerlem ende an die oostzide here Philips Jans zoen mit sinen lande, streckende van den (...) Zwiet upwaert an die Zwet. Ende Dirc Ramp, Angeniese voirsch. ende Heijnric Dirc Rampen (...) voirsch. loveden mit ghezamender hant ende elc voir al Claes Willems soen dit voirsch. lant te waren jaer ende dach als recht is als men een vri eighen erve sculdich is te waren. Ende Dirc Ramp ende Angniese lieden him daer wel of voldaan ende betaelt, den lesten penninc mitten eersten. Voert so lovede Dirc Ramp Heijnric voirsch. hier of scadeloes te houden. In oirkonde desen brieve bezeghelt mit onsen zeghelen. Int jair ons heren duijsent drie hondert neghen ende tnegentich upten Kersavont.

-----  
**Inventaris 0501-1739**

**Regest 720 d.d. 15-01-1462.**

Wij Willem van Bosschuijsen ende Florijs Pietersz. scepenen in Leijden oirkonden dat voir ons quamen Gheertruijt, Ever Heijnricx zoens wedewij was mit Willem van der Vecht hoir man ende rechte voichts hant voir hoir selven, Pieter Eversz., Jan Eversz. ende Jacop Claisz. als voicht van Marritgen Evers dochter sijn wijf, onder hun drien voir hem selven ende voir Aechte Evers dochter hoir suster die onder die voichdie vander stede staet, bij consent ende goetduncken van den wesemeesteren tot Leijden alst Jan van Zonnevelt ende Jan Clais Willemsz. ende gelieden dat zij onder hem vieren voirsch. samentlic vercoft hebben Aernt Eversz. vijftalff hont lands ende sestien roeden lands, luttel mijn of meer bijden hoep sonder maet gemengender vuer mit Vranc van der Does erfnamen ende mit Jmme Jacop Gerijtsz. erfnamen in twee campen lants van vijftalf morgen gelegen inden ambocht van Zueterwoude. Ende heeft belegen an die oestzijde sinte Katrijnen gasthuijs tot Leijden ende an die westzijde den Heijlige geest tot Leijden, streckende voir vanden dijck after an coman Dirc Gerijtsz. lande. Ende Gheertruut, Ever Heijnricxzs. wedewij was mit Willem hoir man voirsch., Pieter Eversz., Jan Eversz. ende Jacop Claisz. loveden mit gesamender hant ende elcx voir all Aernt Eversz. voirn. dese voirsch. vijftalff hont ende sestien roeden lants vrij te waren jair ende dach alst recht is ende als men vrij lant ende eijghen erve sculdich is te waren. Ende Gheertruut mit Willem horen man voirsch.

lovede Pieter Eversz., Jan Eversz. ende Jacop Claisz. voirsz. van die een helfte vande voirsz. landen schadelois te houden. Voirt soe loveden Pieter Eversz., Jan Eversz. ende Jacop Claisz. voirsz. mit gesamender hant ende elcx voir all Gheertruut ende Willem hoir man voirsz. van die ander helfte vande voirsz. landen schadelois te houden. Ende Pieter Eversz., Jan Eversz. ende Jacop Claisz. voirsz. loveden malkander elc den anderen van een derdendeel hier of schadelois te houden. Voirt soe belieden hem Gheertruut mit Willem hoir man voirsz., Pieter Eversz., Jan Eversz. ende Jacop Claisz. voirsz. hier of wel voldaan ende betaelt den lesten pennijnc mitten eersten. In oirkonden desen brieve besegelt mit onsen segelen. Int jair ons heren duijsent vierhondert twee ende tsestich opten vijftienden dach in januario.

-----  
**Inventaris 0501-1740**

**Regest 739 d.d. 20-12-1462.**

Wij Claes Claes Willemsz.z. ende Jan van den Woude schepenen in Leijden oirkonden dat voir ons quam Pieter Allertsz. ende geliede dat hij vercoft heeft Agniese, Jan Lodewijcxz. wedewij een tuijn gelegen bujten der Coepoort andie stede singel inden ambocht van Zoeterwoude. Ende heeft belegen andie zuijtzijde meester Claes Spruijt die berbier ende andie noortzijde Jan Bouwensz. die wtreders kinderen, streckende voir vter stede singelgraft after andie Ganscamp. Ende Pieter Allertsz. voirsz. lovede Agniese voirn. desen voirsz. tuijn te wairen jair ende dach alsoe recht is ende allen commor of te doen die dair nu ter tijt op staet, sonder vijf pont comans pajments tsiaers mitten houde. Voert soe beliede hem Pieter voirn. hier of wel voldaan ende betaelt, den lesten pennijnc mitten eersten. In oerkonde desen brieve bezegelt mit onsen zegelen. Int jair ons heren duijsent vier hondert twee ende tsestich opten twintichsten dach in decembrij

-----  
**Inventaris 0501-1741**

**Regest 746 d.d. 06-06-1463.**

Wij Gherijt Heerman ende Gherijt Rijswijc scepenen in Leijden oirkonden dat voir ons quam Jan Eversz. ende geliede dat hij vercoft heeft Pieter Eversz. sijn broeder een viertienden deel van een vierendeel van ses morgen lants, luttel mijn of meer, gelegen inden ambocht van Sueterwoude. Welke ses morgen lants gemeen leggen mit Brant van der Does kinderen die die een helft toe behoirt, IJmme Jacop Gerijtsz. wedewij een vierendeel ende Gheertruijt, Ever Heijnricxz. wedewij was ende Ever Heijnricxz. kinderen een vierendeel. Ende heeft belegen an die oestzijde Huge Vredericxz., an die westzijde Willem Onderwater, streckende an die Burchwech after an die Vliet. Item noch soe heeft Jan Eversz. voirsz. vercoft Pieter Eversz. voirn. een viertiendendeel van een vierendeel van twintich comans groot tsiaers, staende op ses morgen lants dair of dat die ander deelen vanden voirsz. renten toe behoeren Vranc van der Does kinderen die een helft, IJmme Jacop Gerijtsz. wedewij een vierendeel ende Geertruijt Ever Heijnricxz. wedewij was ende Ever Heijnricxz. kinderen een vierendeel. Ende verschijnen alle jair tot Voirschoeten ende Valkenburger marcten. Welke ses morgen lants gelegen sijn inden ambocht van Sueterwoude voirsz. ende nu ter tijt toebehoert Aecht Gerijt Lijnen wedewij. Ende hebben belegen an die oestzijde Smaer Heijnricxz., an die westzijde Mees Aerntsz., streckende van Stompigerwech after an die Goe. Ende Jan Eversz. voirsz. ende Jan Woutersz. loveden mit gesamender hant ende elcx voir all Pieter Eversz. voirsz. tviertiendendeel van een vierendeel vande voirsz. ses morgen lants ende tviertiendendeel van een vierendeel van de voirsz. twintich comans groot tsiaers staende opte voirsz. ses morgen lants die voirsz. Aechte toebehorende, vrij te waren jair ende dach alsoe recht is ende als men vrij lants ende eijgen renten sculdich is te waren. Ende Jan Eversz. voirsz. lovede Jan Woutersz. voirn. hier of schadelois te houden. Voirt soe beliede hem Jan Eversz. voirsz. hier of wel voldaan ende betaelt, den lesten pennijnc mitten eersten. In oirkonden desen brieve bezegelt mit onsen zegelen. Int jaer ons heren duijsent vierhondert drie ende tsestich opten sesten dach in junio.

-----  
**Inventaris 0501-1742**

**Regest 949 d.d. 25-10-1483.**

Wij Florijs Pietersz. ende Gerijt Rijswijck scepenen in Leijden oirkonden dat voir ons quam Louwerijs Jacopsz., Jan Jacopsz., Aelbrecht Jacopsz., Mathijs Jacopsz., Engebrecht Dircxz. ende Lijsbet Hobbe Heijmansz. wedewij mit hoirs gecoerens voichts hant, samentlijck vervangende Reijer Pietersz. die buijtenlands is ende gelieden dat zij samenliken vercoft hebben Dirc Woutersz. backer een molenwerve mit een thuijn ende hoeren erve dair besijden an, staende in een vterdijck, gelegen bujten die Hage poort inden ambocht van Zoeterwoude. Ende heeft belegen an die een zijde IJsack Gerijtsz. ende Katrijn Tillemans ende an die ander zijde Thonis Gerijtsz., streckende voir vanden dijck after inden Rijn. Ende Louwerijs, Jan, Aelbrecht, Mathijs, Engebrecht ende Lijsbet voirsz. mit hem vervangende Reijner Pietersz. voirsz. loveden mit gesamender hant ende elcx voir al Dirc Woutersz. voirn. dese voirsz. molenwerve ende die thuijn ende hoeren erve voirn. inder manieren voirsz. te waren

jair ende dach als recht is ende allen commer off te doen die dair nu ter tijt up staet sonder up die molenwerve vijf ende veertich scelling ende achte pennijngen comans pajments tsiairs mitten houde ende sonder opten thuijn ende horen erve drie pont ende tien groot pajments tsiairs mitten houde. Ende Louwerijs, Jan, Aelbrecht, Mathijs, Engebrecht ende Lijsbet voirsz. loveden malkander elc den anderen van een sestendeel hier of schadelois te houden. Voert soe belieden hem Louwerijs, Jan, Aelbrecht, Mathijs, Engebrecht ende Lijsbet voirsz. hier of wel voldaan ende betaillt te wesen, den lesten pennijnck mitten eersten. In oirkonden desen brieve bezegelt mit onsen zegelen. Int jair ons heren duijsent vier hondert drie ende tachtich upten vijtienden dach in octobri.

-----  
**Inventaris 0501-1743**

**Regest 977 d.d. 07-04-1486.**

Wij Willem Heerman ende Ghijsbrechtsz. van der Boichorst scepenen in Leijden oirkonden dat voir ons quamen Hillegont Gerijts dochter mit Pieter Claesz. horen man ende rechte voichts handt ende gelieden dat sij samentliken vercoft hebben meester Jan Gerijtsz. horen broeder seven morgen lants, gelegen inden ambocht van Soeterwoude gemengeder vuer ende gemengeder aerde mit Dirck van Bossch, dair nu ter tijt up staet Dirc Claes Willen huijs. Ende hebben belegen an die suijtzijde Pieter Jan Clarensz., an dat westejnde die susteren tot Wermonde, an die noortzijde Onser Vrouwen kerck tot Leijden ende Fije Jacop Boudewijnsz. ernamen ende an dat oestejnde die Vliet. Ende Hillegont ende Pieter Claesz. horen man voirsch. loveden samentlic meester Jan Gerijtsz. voirn. die voirsz. seven morgen lants vrij te waren jaer ende dach als recht is ende als men vrij lant ende eijgen erve sculdich is te waren inden ambocht dairt gelegen is. Ende van desen cope belieden hoir Hillegont ende Pieter voirsz. wel voldaan ende betaillt den lesten pennijnck mitten eersten. In oirkonden desen brieve bezegelt mit onsen zegelen. Int jair ons heren duijsent vier hondert sesendetachtich opten sevenden dach in april.

-----  
**Inventaris 0501-1744**

**Regest 1436 d.d. 25-09-1530.**

Ick Ghijsbrecht van Zwieten ambochts heer ende scout inden ambochte van Zoeterwoude doe kondt allen luijden dat voir mij quam Willem Wermboutsz., geliede ende bekende dat hij vercoft heeft Marritgen Claes dochter een huijs ende erve gelegen inden ambochte voorsz., streckende van Outghert Pietersz. erve tot an Marritgen Anthonis Gerrijtsz. wedewij erve toe. Belegen an die oestzijde Marritgen Anthonis Gerrijtsz. wedewij voorsz., an die zuijtzijde Aelwijn Pietersz. an beiden zijden mit een halve sloot. Ende dair sel een gangpat open bliven alst nu ter tijt leijt, streckende vanden Hogendijck tot inden Rijn toe. Ende Willem Wermboutsz. voorsz. gelooft voir him voir zijn erven ende nacomelingen dit voorsz. huijs ende erve in manieren voorsz. Marritgen Claes dochter voirn. vrij te waren, jaer ende dach als recht is ende alle commer ofte te doen die nu ter tijt op staet, als men een vrij huijs ende eijgen erve sculdich is te waren gelijcken buijerlant, sonder dair jairlicx op te bliven staen vier ende twintich comans groot mitter gift na wtwijsinge des briefs dair off sprekende. Van welcke coop Willem voorsz. lijdt ende bekent wel voldaan ende betaelt van Marritgen voirn., den lesten penninck mitten eersten. Alle argelist wtgesondert. In kennisse der wairheit so hebbe ick Ghijsbrecht van Zwieten ambochtsheer ende scout inden ambocht voorsz. desen brief bezegelt mit mijn zelfs zegel ende hier onder an gehangen. Dair an, bij ende over waren als tugen Outgher Pietersz. ende Cornelis Jansz. Int jaer ons heren duijsent vijffhondert ende dertich upten vijffentwintichsten dach in septembrij.

**Regest 1484 d.d. 03-11-1535.**

Wij Dirck Florijsz. Heerman ende Gerijt Heerman scepenen in Leijden oirkonden dat voirden gerechte quamen die heijlige geestmeesteren binnen Leijden als Willem Dircxz. olijslager, oude Dirck Jan Reijersz.z., Jan Paeds Bouwensz. ende Dirck Pietersz. ende gaven over voir hem ende hoeren nacomelingen van des voorsz. Heijlige Geest wegen, bij consent vanden gerechte Willem Wermboutsz. schuijvoeder eenen schouten brief van Zoeterwoude, daer desen brief doersteken is. Mit recht ende mit vonnisse als recht is. Ende scepenen wijsden Willem Wermboutsz. voorsz. dair mede te winnen ende te verliesen in allen schijn oft die heijlige geest meesteren voorn. ende diet naemaels wesen zullen van des zelven Heijlige Geests wegen, zelve waeren. Welck huijs ende erve inden principalen brief begrepen den Heijlige Geest voirn. an gecomen is mit den drie weeskinderen van Marijgen Claes dochter zaliger gedachten, als Claes Willemsz., Katrijn Willems dochter ende Cornelia Willems dochter die inden voorsz. heijlige geest huijs onderhouden worden. In oirkonden deze brief bezegelt mit onsen zegelen. Int jaer ons heeren duijsent vijffhondert vijf ende dertich upten derden dach in novembri.

**Inventaris 0501-1745**  
**Regest 1631 d.d. 03-05-1544.**

Ic Gerijt Bruijnen lindeweaver kenne ende belijde mits desen voer mij ende mijnen erven vercoft te hebben Sijmon Cornelisz. een huijsinge ende erve gelegen inden ban van Zoeterwoude. Ende heeft belegen ande oestzijde Marijtgen Thonis Gerijtsz. sceepmakers wedewij ende ande westzijde Dirck Adriaensz. Schimer mit die halve sloeten an beijden zijden van tvoersz. huijs ende erve. Welck huijs ende erve is streckende mit een pat wt den Rijn tot an Sijmon Cornelisz. voirsz. erve toe ende dat pat voertgaende aen die westzijde van Sijmon Cornelisz. erve ende Out Pietersz. erve tot aen den Rijndijck toe. Mits voirwaerden dat Sijmon Cornelisz. voirsz. zijnen erven ende nacomelingen dit voirsz. huijs niet verder en sullen moegen vuyt tijmmeren nae den Rijn toe dan totten grooten esschen boem toe die voer tvoersz. huijs staet tusschen den Rijn ende thujs upte werfve. Noch zijnt voirwaerden dat Sijmon Cornelisz. sijnen erven ende nacomelingen dit voirsz. huijs ende erve niet en sal moegen vercopen enige sceepmakers. Noch zijnt voirwaerden dat Simon Cornelisz. voirsz. noch zijnen erven ende nacomelingen niet en sal moegen pooten up die zuijtoestzijde vande werve voersz., dat Marijtgen Thonis voirsz. of hoeren nacomelingen hinderlicken soude moegen wesen up haer werfve van zonneshijn. Mits dat die boomen die daer nu ter tijt op staen sullen moegen blijven staen tot profijt van Sijmon Cornelisz. voorn. sonder wederseggen van ijemant. Voerts zoe beloeve ick Gerijt Bruijnen voirsz. voer mijn, mijnen erven ende nacomelingen dit voorsz. huijs ende erve inder manieren voorsz. te vrijen ende te waeren, jaer ende dach als recht is ende allen commer off te doen die daer nu ter tijt up staen, gelijk men huijs ende erve die inden ambochte voirsz. gelegen zijn sculdich is te vrijen ende te waeren, sonder datter up tvoersz. huijs ende erve sal bliven staen veertich comans grooten paijments tsiaers mitten houde die sinte Katerijnen gasthuijs tot Leijden dair jaerlicx op hebben. Hier onder stelle ick Gerijt Bruijnensz. voirn. mits desen mijn parsoen ende allen mijnen gueden, roerende ende ontroerende dien ick nu ter tijt hebbe off noch hier naemaels vercrijgen sal moegen, gheen gueden vuytgesondert noch buijten gehouden. Ende dit all tot bedwanck van allen sheeren rechteren, geestelick ende waerlick. Versueckende oick mits desen ick obligant voirsz. aen allen sheeren rechteren int gundt dat voirsz. staet, mitsgaders in costen, scaden ende interesten die ter saicke van desen vallen moegen ofte gedaen werden, gecondempneert te werden sonder eenige excusacie, exceptie, defencie ofte weer van recht daer jegens te moegen doen ofte doen doen in eenijger manieren. Voerts zoe bekenne ick Gerijt Bruijnensz. voirn. mits desen van dese coope van Sijmon Cornelisz. voirsz. wel voldaan ende betaelt te wesen den lesten penninck mitten eersten. Desen toerconden soe hebbe ick Gerijt Bruijnensz. voirsz. mijn dagelicx hanteijcken mit mijn selffs handt hier beneden gescreven in presencie van Vincent Gerijtsz. ende Dirck Pouwelsz. die desen brief als getuijgen doer beede van mij mede onderteckent hebben. Aldus gedaen upten derden dach in mej anno duijsent vijfhondert vier ende veertich.

**Regest 1775 d.d. 13-01-1551.**

Ic Adriaen Vranckensz. schout van Zoeterwoude doe condt ende kenlick allen luijden dat voer mijn ende getuijgen hier onder gescreven ghecomen sijn IJsbrant Willemsz. sceepmaker, oude Cornelis Willemsz. sijn broeder, vervangende hoere zwaegers ende hoer susters, ende Alijdt Claesdr., Willem Wermboutsz. weduwe mit Rembrant Pouwels hoere gecoren voicht in dese saicke ende bekenden die voorsz. comparanten mit gesamender handt getransporteert ende overgegeven te hebben, transporteren ende geven over mits desen Sijmon Cornelisz. ende sijnen erven ende nacomelingen, eenen schouten besegelden brief mit een schepenen transfix van Leijden doersteken, roerende van een huijs ende erve gelegen buijten die Hoegewoertse poorte anden Hoegen Rijndijck inden ambochte van Zoeterwoude voersz. Ende heeft nu ter tijt belegen ande oestzijde Joest Thoenisz. mitte halve sloot, ande westzijde de schuijer mitte halve sloot ende Cornelis Jansz. van Middelburch, streckende van Gerijt Bruijnensz. erff tot Oudt Pietersz. erff toe. Daer op staende vier ende twintich comans groot tsiaers mitte ghijft, all breeder blijckende bijden selven principaelen brief daer op desen mijnen brief doersteken ende getransficxeert is. Omme Sijmon Cornelisz. daer mede te moegen winnen ende te verliesen in allen schijn off IJsbrant Willemsz., oude Cornelis Willemsz. inden naeme als vooren ende Alijdt Claesdr. voersz. selver waeren. Ende indien dit voorsz. huijs ende erve bij Willem Wermboutsz. hoerluijder vader was saliger gedachten vande jaeren dat hij tvoersz. huijs ende erve gehadt heeft, ijert belast, beswaert ofte becommert waere, boven het inhouden vanden selven principalen brief voersz., dat sal Sijmon Cornelisz. voern. ofte sijnen erven ende nacomelingen moegen versien ende verhaelen an alle die goeden die IJsbrant Willemsz. ende oude Cornelis Willemsz. gebroeders voorn. gesamentlijck ende elcx een voer alle nu ter tijt hebben ofte namaels vercrijgen moegen, roerende ende ontroerende, gheen goeden ofte plaetsen vuytgesondert ofte buijten gehouden ende dat moegen in winnen als erfpenninck mit bedwanck van allen sheeren rechteren, geestelicken ende waerlicken, soe dien houder sbriefs dat believen sal, mit die costen daeromme gedaen ende geleden. Voort soe bekenden hem IJsbrant Willemsz. ende oude Cornelis Willemsz. inden naeme ende van wegen als vooren ende Alijdt Claesdr. mit haer voersz. voicht, van

dese coepe ende overghifte van tvoersz. huijs ende erve all wel voldaan ende betaelt te wesen van Sijmon Cornelisz. voern., den laetsen penning mitten eersten. Alle dinck sonder arch ofte liste. In kennisse der waerheijt soe hebbe ick Adriaen Vranckensz. als schout van Zoeterwoude voersz. desen brieff doer die principaele brieve getransficxeert ende vuyjthangende besegelt mit mijnen zegele vuyjthangende hier beneden an desen brieff gehangen. In presencie ende bijwesen van Jacop Sprongsz. ende Huijch Aernts zoen buijerluijden inden ambochte voersz. als getuijgen hier over geroepen ende gebeden, die tot meerder kennisse elcx hoer naeme ofte dagelicx hanteijcken mit hoer selfs handt hier onder gescreven hebben. Aldus ghedaen upten dorthiensten dach in januario anno duijsent vijfhondert ende eenenvijftich nae gemeen schrijven.

-----  
**Inventaris 0501-1746**  
**Regest 1834 d.d. 22-11-1554.**

Ic Willem Adriaensz. schout inden ambochte van Zoeterwoude doe condt ende kenlick allen luijden dat voer mijn ende getuijgen hier onder gescreven gecomen ende gecompareert sijn selver parsoenlicken Pieter Outtensz. ende Gherijt Woutersz. wever ende bekende die voersz. Pieter Outtensz. mits desen voer hem sijnen erven ende nacomelinghen wel ende wettelicken vercoft te hebben Sijmon Cornelisz. een erff, bijden hoop sonder maet, mitten gewasse daer op staende, gelegen inden ambochte van Zoeterwoude voersz. Ende heeft belegen ant zuijteijsde den Hoegen Rijndijck, ant noorteijnde Sijmon Cornelisz. voorn. selver, ande oestzijde Joost Anthonisz. scheepmaker ende ande westzijde Cornelis Jansz. van Middelburch. Ende Pieter Outtensz. voern. beloefde ende beloeft mits desen voer hem, sijnen erven ende nacomelingen dit voersz. erff mitten voern. gewasse daer op staende vrij te waeren, jaer ende dach alst recht is gelijk buijerlandt ende als men vrij landt schuldich ende vrij erff schuldich is te vrijen ende te waeren inden ambochte voersz. daert gelegen is. Ende tot meerder versekertheit vande voersz. waeringe zoe stelt hem Gherijt Woutersz. comparant voern. als waerborghe voer Pieter Outtensz. voersz. Ende dit onder tverbant van alle hoere tegenwoerdige toecomende, roerende ende ontroerende goeden, gheen goeden ofte plaetsen wtgesondert ofte buijten gehouden, all tot verbant ende bedwanck van allen sheeren rechten ende rechteren, gheestelicken ende waerlicken daer ende an welcke goeden den houder van desen tot sijne koere gelieven sal te procederen, mit alle die costen daeromme doende ende lijdende. Voort soe bekende hem Pieter Outtensz. van dese coepe van Sijmon Cornelisz. voorn. al wel voldaan ende betaelt te wesen, den laesten penning mitten eersten. Ende Pieter Outtensz. beloefde Gherijt Woutersz. voersz. hier of costeloes ende schadeloes te houden. Alle dinck sonder arch ofte list. Desen toerkonden zoe hebbe ick Willem Adriaensz. als schout voersz. desen brief doer beede ende verlijden vande voersz. comparanten besegelt mit mijnen zegele wthangende hier onder an desen brief gehangen. Int bijwesen van Mees Adriaens zoen ende Jan Floris zoen buijerluijden inden ambochte voersz. als getuijgen hier over geroepen ende gebeden. Die welke tot meerder vestenisse elcx hoere gewoentlicke hantgeschrift mit haer selfs handt hier onder gescreven hebben. Aldus gedaen int jaer ons heeren duijsent vijfhondert vijer ende vijftich upten twije ende twintichsten dach in november.

-----  
**Inventaris 0501-1901**  
**Regest 558 d.d. 05-07-1446.**

Wij Dirc Coen Gerijtsz. ende Sijmon van den Woude scepenen in Leijden oirkonden dat voir ons quamen Poes Dircxz., Alijt Dircx dochter mit Huge van Houte horen man als hoir rechte voicht, Reijnier Woutersz., Geertruut Wouters dochter mit hoirs gecorens voichts hant, Lijsbet Wouters dochter mit Clais Pietersz. horen man als hoir rechte voicht, Jacob, Bertelmees, Reijnier ende Jan Claes Reijniersz. kinderen, alle als erffnamen van Geertruut Reijniers saliger gedachten horen oude moeder ende hebben in manieren hier na verclaert, dats te weten dat van die goeden die nader wtsprake des ses segsluijden als heer Boudewijn van Poel, heer Willem Heerman, Jan Jan Everszsz., Willem Heerman, Jan Dirc Coenensz. ende Pieter Florijsz. an drien gaen sullen gevallen is te lote: Eerst Poes Dircxz. ende Alijt Dircx dochter voirsz. voir hoir derdendeel, twee morgen lands mijn vijf ende tseventich gairden, gelegen inden ambocht van Coudekerck die gecoft waren jegens Jan van Poelgeest Jansz. ende nu ter tijt gebruect Dirc van Leewen, ende negen morgen lands in den ambocht van Hasertswoude ende gebruect nu ter Jan Clementsz. Behoudelic dat Poes ende Alijt voirsz. wtreycken ende geven sullen eens an gelde te betalen sestien wilhelmus scilden die Clais Reijniersz. kinderen voirsz. hebben sullen tot die drie morgen lands, gelegen inden ambocht van Coudekerck als hier na geroert staet in haer lotinge van hoir derdendeel. Item Reijnier Woutersz., Geertruut Wouters dochter ende Lijsbet Wouters dochter voirsz. sijn te loete gevallen voir hoir derdendeel van die voirsz. goeden die an drien gaen sullen, ses morgen lands gelegen inden ambocht van Oudshoirn die nu ter tijt gebruect Jan Clais Cranen soen. Ende noch vijf morgen lands inden selven ambocht gelegen die nu ter tijt gebruect Jan Marcxz. Item Jacob, Bertelmees, Reijnier ende



Jan Claes Reijniersz. kinderen voirsz. sijn te loete gevallen voir hoir derdendeel van die voirsz. goeden die an drien gaen sullen, drie morgen lands gelegen inden ambocht van Coudekerck die nu ter tijt gebruct Dirc van Leewen. Ende hiertoe sestien wilhelmus scilden die Poes ende Alijt voirsz. wtreycken sullen als voirsz. is. Voirt van die ander goeden die an negenen gaen sullen nader voirsz. ses segluijden wtsprake is mit eenre loete gevallen Reijnier Woutersz. voirsz. alleen voir hem een huijs ende erve dat gelegen is te Leijden in sinte Pieters Nuwe stege, dair Geertruut Reijniers voirsz. saliger gedachten in plach te woenen ende twee brieven, die ene van sestien scellinge tsamen houdende ende die ander seventien scellingen tsiairs houdende, beijde sprekende op twee huijsen ende erven staende an malkander te Leijden in Levendeel. Ende noch hier toe vier phillipus bourgongen scilden, eens te betalen an gelde. Item Poes Dircxz., Alijt Dircx dochter, Geertruut Wouters dochter ende Lijsbet Wouters dochter voirsz. sijn mit loete te samen onder hem vieren gevallen van die voirsz. goeden die an negen gaen sullen, twee morgen ende anderhalff hont lands, gelegen inden ambocht van Soeterwoude bij Bosschuijsen ende nu ter tijt gebruct Jan Willem. Item die helft van twaleftalf morgen lands gelegen inden selven ambocht van Soeterwoude die nu ter tijt gebruct Jan Eijlaert. Item noch inden selven ambocht seven morgen lands die nu ter tijt gebruct Pieter Gijsbrechtsz. Item twee scellingen goets gelts tsiairs opte Hogewoirt te Leijden, staende up Gerijt Nachtegaels huijs ende erve. Item een eduwairdus nobel tsiairs optie Hoeijgraft te Leijden, staende up Wouter Heijnricxz. huijs ende erve. Item veertich scellinge goets gelts tsiairs, staende te Leijden up IJsbrant Bredenroen huijs ende erve int Noorteijnde. Ende noch twee scellingen tsiairs, staende te Leijden op sinte Katrijnen gasthuijs. Item Jacob, Bertelmees, Reijnier, ende Jan Claes Reijniersz. kinderen sijn te loete gevallen te samen onder hem vieren van dese voirsz. goeden die an negenen gaen sullen: In den eersten vier morgen lands gelegen inden ambocht van Coudekerck inde Hoge Wairt ende gebruct nu ter tijt Jacob Willemsz. Item tot Alphijn vijftalf morgen lands ende bruct nu ter tijt Willem Jansz. Item vijf morgen lands gelegen inden ambocht van Hasertswoude ende gebruct nu ter tijt Aelwijn Jacobsz. ende Clais Jan Willemsz. Item vijf hont lands tot Leijderdorp bijden Zijl ende bruct nu ter tijt Sijmon Vredric Dirc Nuweveensz. Item anderhalf morgen lands gelegen inden ambocht van Soeterwoude ende is gehieten die Zwaelewaert ende bruct nu ter tijt Mees Hoevensz. Ende noch hier toe vijf scellinge tsiairs, staende in Levendeel te Leijden up een hoic huijs ende erve, toe behorende Poes Dircxz., Evert Dircxz. (...). Welke lotinge, delinge ende scheijdinge die voirsz. erffnamen van Geertruut Reijniers voirsz. saliger gedachten alsoe Poes Dircxz., Alijt Dircx dochter mit Hoge van Houte hoir man als hoir rechte voicht, Reijnier Woutersz., Geertruut Wouters dochter mit hoir gecoren voichts hant, Lijsbet Wouters dochter mit Clais Pietersz. hoir man als hoir rechte voicht, Jacob, Bertelmees, Reijnier ende Jan Clais Reijniersz. kinderen alle gader ende een ijgelic van hem bij sonder bekenden ende belieden te vreden te wesen. Ende gelooveden malkander gheen ander scheijdinge, delinge of lotinge tot enigen dagen te eijtschen van die voirsz. goeden die hier voir geroert sijn ende als voirsz. is sij te samen geloet ende gedeelt hebben. Behoudelic dat die gene die in enigen goeden te samen geloet sijn, voit onder hem selven sullen mogen loeten ende delen alst hem genoicht sulke goeden als sij te samen mit lotinge hier voir geroert, gemeenlike gecregen hebben. Oic mede sijnt voirwairde onder den voirsz. erfnamen van Geertruut Reijniers alsoe wair dat sake datter enige goede nu of hier namails ongedeelt bevonden worden, dat dair een ijgelic van hem negenen voirsz. sijn deel ende goede recht in ende an sal behouden. Alle dinge sonder argelist. In oirkonden desen brieve bezegelt mit onsen zegelen. Int jair ons heren duijssent vierhondert sessendeveertich upten vijften dach in julio.

.....

### **Inventaris 0501-1935**

#### **Regest 983 d.d. 14-04-1486.**

Wij Dirck Dircxz. ende Willem Heerman scepenen te Leijden oirkonden dat voir ons quamen Willem Willemsz. mit Geertruijt Gerijts dochter sijn gherechte wijf ende gelieden dat sij samelicken ontfangen hebben van meester Jan Gerijtsz. haer broeder ende Hillegont Gerijts dochter horen suster hondert engelsche nobelen, achte schellingen ende vier penningen groet vlaems voir den engelsche nobel gerekent, die Willem Willemsz. mit Geertruijt sijn wijf voirsz. medegave ende h.... voirwairde geloeft sijn. Ende des gelijcx soe bekennen Willem ende Geertruijt noch ontfangen te hebben van meester Jan voirsz. alle alsulke erfnisse, gouden ende besterfnisse als Willem ende Geertruijt voirsz. opgecomen ende anbestorven mogen wesen ende dat bij dode van Gerijt Jansz. hoir vader ende Cornelia Cornelis dochter hoir moeder, te weten dat alle die voirsz. erfnisse ende besterfnisse besloten is in die voirsz. hondert nobelen ende voit an alle tgeen dair Willem ende Geertruijt voirsz. in gerechtet mogen wesen. Voort meer soe bekennen Willem ende Geertruijt voirsz. dat meester Jan Gerijtsz. hoir broeder voirsz. alleen toebehoirt ende dat zij dair cleijn noch groot an en hebben, an alsulken huijs ende erve als meester Jan voirsz. staende heeft up sinte Jacops graft bijden ramen, dat belegen heeft an die een zijde Dirc Jacopsz. ende an die ander zijde Dirc Andriesz. Ende desgelijcx an seven morgen lants gelegen inden ambocht van Zoeterwoude in die Weijpoort, ghemengeder

aerde mit Dirc van Bossch, dair nu ter tijt up staet Dirc Clais Willemsz. huijs. Ende hebben belegen an die zuijsijde Pieter Jan Claesz. ernamen ende an die oostzijde die Vliet. Noch soe geven Willem ende Geertruijt voirsz. over dat meester Jan hem broeder voirsz. heffer wesen sal zijn leven lanck van een pont groot tsiars lijfrenten, specterende upter stede van Leijden. In welck pont groot tsiars Geertruijt voirsz. mede verlijftocht van gelijck die lijfrentebrief dat wtwijst. Ende Willem ende Geertruijt voirsz. schelden samentlicken quijt meester Jan Gerijtsz. ende Hillegont Gerijts dochter voirn. vande voirsz. hondert nobelen ende desgelijcx van alle ernisse ende besternisse die Willem ende Geertruijt voirsz. upgecomen of an bestorven mogen wesen ende dat bij dode van Gerijt Jansz. voirsz. ende Cornelia hore moeder voirn. Ende voirt in alle tgeen dair Willem ende Geertruijt voirsz. in gerecht mogen wesen ende oick van als dat zij up meester Jan ende Hillegont voirsz. te seggen gehadt mogen hebben tot deser tijt toe, het zij mit brieven of sonder brieven hoe ende waer of datet roeren mach ende niet dair of wi gestonden. In oirkonden desen brieve bezegelt mit onsen zegelen. In jair ons heren duijsent vier hondert ses ende tachtich upten veertienden dach in octobrij.

.....